

Nwàk JEM

Nwàk nè Jem à còm ènə nà' rwiŋ mègù bə ntip sè yà'a bə bum sè yà'a yegè nùumbu pwe'. Yi sə cep bum sə bə gbə' mok sè yà' nòjəja. Yi sə jə yà' ngòtip bwiŋ bə nsàp ŋkərə nè a bəboŋ də ŋwée tse' nà', nə ye bə ncu nè bohòKrətèŋ wèŋ. Nwàk ènə cèpgè gugəŋ də ŋwè nè yi dzəmtse' Krest fana yà' tse' ngòyəəŋ bə fàha sè ŋgèŋgàŋ sə gù yà'.

¹ Còm ŋwàk nè'e mù Jem, nè mɛ mo ŋgà fàk Nwì, nə ye Tà Jisòs Krest. Mù cèpsə bwe Izùre sè bòp hum-ncòp-ba sè wo sam cu lo mənə nzeŋgòn nə pwe' bəboŋ.

*Mə̀mumsəə Yu Nə
Aco Nà' Gəŋsə Wù*

² Bwe tè'lam wèŋ, ŋga nsàap mə̀mumsə zəzok sə tesə və-a bohòwèŋ, wèŋ tse' ŋgòkwa cèbùə, ³ bə̀usə wèŋ rì duk də bum yè'sə mumsə wèŋ də wèŋ sə fa malì ntəm awèŋ bohòNwì àlɛ, fana yà' gəŋsə wèŋ. ⁴ Təəŋ bə nsàp ntəm nè nà'a gugəŋ tè ya wu ye kəkərə bə bum pwe', nə kà yumok jamə.

⁵ A ye-a ŋga ŋwè nəmòk mətsetsə'rə wèŋ ka ŋkərə nè co yi gə riŋ yumok bə zeŋ tse', yi ləŋ bohòNwì, Nwìi nə fa yi. Yi fagè ndaaŋwè pwe' bo to bə kwəkwa. ⁶ A ye-a ŋga ŋwè sə ləŋ yumok bohòNwì, yi dzəmtse' sə ntə̀̀ yi də yi nə tse' yà', yi kà də yi sə mərə sə ntə̀̀ yi duk. Busə ŋwè nè

yi mərə-a, ye də yi co ndzəp nè fəfə bwì' lògè nà' ma si bə ma ŋkwèŋ. ⁷ Nsàp ŋwè nè yi mərəgè bum nà'nə kà tsəm də yi nə tse' yumok bohòTà Nwì tsəm. ⁸ Bùsè yi tse' tsətsərè ba, nə kà yusè yi dzəm rì.

⁹ Krətèŋ nè yi ŋgà jìŋ, yi tse' ŋgòkwa, bùusè Nwì a kùksə yi. ¹⁰ Fana moma nè yi ye ŋgà ghàk, yi tse' ŋgòkwa sè', bùusè Nwì a bùsə yi ŋwè nè jo, bùusè yi nə ca gesə lo co mvè'nè nzàam ŋgaŋ ye'gè ye'e. ¹¹ Nùum togèə, a curə ntèŋ, nzàam ŋgaŋ ye' gbə sə nze, fana mvəsè yà' anə sə fom sə me nè mvèsè. Yà'a sè' mùm̀vè'nè ŋgà ghàak nə kpə mak nonjə bum ghàak ye sə ve'nə.

¹² A rɛŋsi bohòŋwè nè mèmumsè sə vè bohòwù, fana wù sə təŋ mali gɛgɛŋ; bùusè wù gha'-a mèmumsè nə, fana wu nə kə tse' lèlāk nè nà'a lùŋ nè Nwì a kàk də yi nə fa ndà lòoŋ nè nà' dzəm yi nə. ¹³ Nsàp mèmumsè nà'nə vèə, fana kà də ŋgəŋgàaŋ duk də Nwì sə lap mandzè də yi gbə duk. Bùsè kaco wo mumsə Nwì bə bɛp yeŋ, fana Nwì kà ye ŋwè bə bɛp sə mùmsègè. ¹⁴ Mèmumsè vègè bohòŋwè ŋga yi tsərə kok bum sè bɛp sə ntɛ̀ɛ̀ yi. ¹⁵ Nwèe tsərə bum sè bɛp yè'sə fana yi gɛ bɛp. A ye ŋga bɛp kùu' nà' jəŋ və kpə.

¹⁶ Bwema am wèŋ, kà də wèeŋ jipsə tu awèŋ duk. ¹⁷ Yusè yà'a bəboŋ pwe' tsəgè mɛbu bohòNwì, yi nè yi a gù mareŋ. Nwì bə tu ye kà kupsègè. Kaco yi buuŋ lo, nə me'rə nonjə ves sə ndzəmè yeŋ. ¹⁸ Nwì à dzəm ko' yi də yi cok fis ves, nə gɛ ves a buuŋ bwe ye bə ncèp cù nje nè

zìnə nə, də ya vesùwèŋ ye bùu ye sè mantombì
bè bum sè yi a gù sənə nze nə pwe'.

Yuk Nə Gu

¹⁹ Bwema am wèŋ, wèŋ kà yè'e swì yuk. A ye-a sè ndà lònŋ, yi nonşə ntu' to ŋgòyuk bum, nə jəŋ mvək fùè ŋkuŋ nə cep, nə ye sè' fùè ŋkuŋ yi jok. ²⁰ Busè ŋwèe jok-a, kaco yi gu riŋ to yusè bèboŋ sè co Nwì kwa bè zeŋ yeŋ. ²¹ Fana nà'a njo nè mù sè tsè' weŋ də, wèŋ fis ŋkùì' sə ntuè wèŋ sə, nə kà jònŋ sə gù ke'cà. Fa ni' awèŋ ndzə bohòNwì, nə dzəm tse' megu ncèp ye nè wèŋ ànə yuk to mvəsè yi a gesə nà' sə ntuè wèŋ. Mègù ncèp nà'nə nè aco nà' fis weŋ mvwe' kpə.

²² Bo bohòwèŋ cèbùè də ŋga wèŋ yuk-a ncèp ye nə, wèŋ sə gu yà'. Busè ŋwè nè yi yuk megu-a yà' bè ntu', nə kà sə gù, fana ye də yi sə bòrə ni' ye. ²³ Yi co ŋwè nəmòk nè yi kək ja'a si ye ndzənə darəgà', nə ye mvə'nè yi cu. ²⁴ Yi yə tsərə mè si ye bèboŋ, fana yi lo ntèn, yi swì bisə mvəsè yi anə ye sə jwanŋ. ²⁵ Wu kək ja'-na lùuk Nwì sè yà'a yəyərè, sè yà'a fi mè'rəgè bwìŋ mvwe' bəp sə, fana nə sə gu məm̀vè'nè yà' sə tsè' wu, fana Nwii nə se wu bè bum yo sè wù sə gù lònŋfo'. Busè wù sə gù yà', nə kà də wù sə yu'rə mègù bè ntu', nə swì bisə duk.

²⁶ ŋwè nəmòk tsərə-a ye də yi ye ŋwè nè yi sə be' mandzè Nwì, nə kà lum ye beŋ, fana ye də mandzè Nwì nè yi sə yùu nə, nà'a wà. Yi sə bòrə yà'sə ni' ye. ²⁷ Bum sè Tà Nwii kək ja'agè ye də yà'a mandzè nè zìnə nə ye rərəŋ, a ŋga ŋwè sə tesə bwe njìŋ bè bàa yepmfə sè wo sə yə ŋgə',

nə sə jəŋ ŋkərè bə ni' ye də ya bum nzenğòŋ
kà yi ŋgògù yusè bɔp bòrè.

2

Bwìŋ Pwe' Yəyərè BohòNwì

¹ Bwema am wèŋ, wèŋ sè wèŋ à fa ntəm awèŋ
bohòTà Jisòs Krèst, nè ŋwè nəmòk kaco yi mok
kuk dzen, wèŋ tse' ŋgòjəŋ bwìŋ pwe' yəyərè.
² Yusè mù sə duk sə ve'; A duk-a də bwìŋ vè
mvwe' kwe' bùu cos bwìŋ ba, ŋgà ghàk bə ŋgà
jìŋ. Ŋgà ghàk nə ni tse' cək nə tasə mvìŋ sè
yà' gɔ nteŋ nè bɔp ndzə bohòyi, nè ŋgà jìŋ nə
ni ye bwe gaa cək. ³ Wo vèə, wèŋ lap dzè' nè
bèbɔŋ, nə duk fa ŋgà ghàk nə də, <<Hooyo' vè
bèbɔŋ, kè cà cum fən.>> Nə duk fa ŋgà jìŋ nə
ye duk də, <<Təəŋ tse' yòfa' nə,>> kè də, <<Kè
cum yòsə nze ŋgɔ kùhu mù fən.>> ⁴ Wèèŋ gɔ-a
ve'nə, ye də wèŋ kuk wo ka mu lisè, nə duk sə
vèə wèŋ də mok bògha' mok yeŋ à? Wèèŋ gɔ-a
ve'nə, ye də wèŋ sə sak bwìŋ, nə sa'a nə bə jòn.
⁵ Bwema am wèŋ-a, yè; Nwì a ghàksə ŋgaa jìŋ
yà'sə bə dzədzəm nè yà'wèŋ tse' bohòyi, nə duk
də wo nə kə tse' mvwe' ncum mvwe' lak sè yi a
kà' nònşə fa bùu sè wo dzəm yi. ⁶ Fana wèŋ jə
ŋgaa jìŋ co bùu sè wà. Ŋga a sè dàpsə lògè weŋ
mu kot mvwe' nzak ndà wèŋ? A yegè sè ŋgaa
ghàak sə. ⁷ A soho bɔpsəgè liŋ Jisòs sè bèbɔŋ
sè wèŋ tse' yà'a ka sè wo yeŋ à? ⁸ A bèbɔŋ də
wèèŋ nonşə lùk nè Nwì nè yi ŋkum à còm nonşə
ndzənə ŋwàk ye də,
<<Dzəm moma yo mvè'nè wu dzəmgè ni' yò.>>

⁹ A ye-a nga wèŋ sə jə bwìŋ də mok ghak mok, fana ye də wèŋ gù bup, nə gbùù nə lùk Nwì lan, bùusə wèŋ ka lùk nje nə nonşə.

¹⁰ Yusə də, ɲwèè nòŋsə-a lùuk sə lòoŋ, nə gu bupsə megu nè mò'fis, ye də yi yəyərè bə ɲwè nè yi gù bupsə ye yà' lòoŋ. ¹¹ Busə Nwì nè yi à duk də, <<Ŋwèè kà nto ko>>, à duk sè' də, <<Kà ɲwè zə.>> Ye də wu ka-a nto kogè, nə zə ɲwè, wu gu sə ɲgà gbù lùk co ɲwè nè yi à gbù yà' pwe', bùusə wù zə ɲwè. ¹² Ye də wèeŋ sə cep bum, nə sə gu bum co bùù sè wèŋ rì də Nwii nè kè sak weŋ bə lùk nè yi a nòŋsə. Lùk ye nə tse' ɲəŋ sè ɲgò'fis me'rə bwìŋ mvwe' bup. ¹³ Nwii nə sak ɲwè nè yi kà manziŋ koksəgè sè' jì manziŋ, fana bùù sè wo koksəgè manziŋ ka ɲgòwəp nzak yeŋ.

NgòTse' Dzədzəm Nə Ye NgòGù Fàk

¹⁴ Bwema am wèŋ, a ye-a nga ɲwè duk-a də yi dzəm bohòjisos Krest, wù kà yà' bə fàak sè yi sə gùu yə, ye də dzədzəm nè'nə nsàp nè fòlè? Aco nsàp dzədzəm nà'nə tesə yi à? A bùè. ¹⁵ A duk-a də moma yònè ɲwəmbam kè nè ɲwàŋwè ka cək tse', nə kà zuzɹ sè' tse', ¹⁶ yi və bohòwù, wù duk fa gu yi bə cù də, <<Gèŋ bèboŋ, Nwii se wu, mbəp kà wu ko, ye zəze', ɲjèè kà wu ya mbà,>> nə kà yi yusə co yi tesə ni' ye bə zeŋ fa, ye də yu bèboŋ sè wù gù sə yà? ¹⁷ Dzədzəm bohòncèp Nwì mègù sè' vɛ'nə də, nà' kà-a fàk sə gu, ye də dzədzəm ànə kpɹ lan, nà' ka fàk tse'.

¹⁸ Kàmòk aco ɲwè nəmòk duk də, <<Aco ɲwè nəmòk tse' ye dzədzəm, mòk sə gu ye fàk.>> Ŋwèè duk-a vɛ'nə, mɹ fek ɲgèŋgàŋ duk də, yi

niŋ tsok fa-a mu dzədzəm ye nə jì fàk, ya mu niŋ tsok fa yi dzədzəm am bə fàak sè mù sè gùu. ¹⁹ Wù dzəm nè zìnə də Nwì mègù yi nè mò'fis à? A ve'nə bəboŋ. Wù rì sè' də yòŋsəə ze' wèeŋ dzəm gè sè' ve'nə nə sə wəp, nə sə kaŋ. Nsàp dzədzəm nà'nə ka fàk tse'. ²⁰ Ho'ò, wù ləm! Wù sə duk yè'e də wo tsok wu tsə'ə də, wù tse'-a dzədzəm nè nà'a kà fàkgè, ye də nà'a wà à? ²¹ Wèeŋ kək ja'a na. Wèŋ rì də tàcici àvès Abrahàm a bùuŋ ɲwè nè kəkurè bohòNwì bùu nsàp fàk nè yi a gù də yi fa mo ye Azik co satikà', ka ve'nə yeŋ à? ²² Aco wèŋ ye yàwèŋ sè' də dzədzəm ye à sè gi yùrə be'lə mvwe' mò'fis bə fàak ye, fana fàak ye sə gu boŋsə wesə dzədzəm ye nə. ²³ Yà'a mvwe' sè yà' à yəəŋ də yusè wo à còm ndzənə ɲwàk Nwii zìnə. A nja də,

<<Abrahàm à dzəm yusè Nwì à cèep, fana Nwì jəŋ yi co ɲwè nè kəkurè.>>

Wo to fa yi liŋ mok də, Nge'e Nwì. ²⁴ Wèŋ yə yàwèŋ sè' duk də ɲwèe yegè bəboŋ bohòNwì bə nsàp fàk nè yi gùu, ka bùu dzədzəm yi yi megu. ²⁵ Nwà sàhà nè wo à to liŋ ye də Rahàp nà'a à ye bohòyi sè' ve'nə. Yi à ye ɲwè nè bəboŋ bohòNwì sè' njo fàk. A ye ɲga yi à ko swìhi ɲgàa mfuəp bùu Izùre, nə casə wo mvwe' mandzè nè zok. ²⁶ Mègù sè' mvmvə'nè ni' ɲwèe ye-a jì yòŋsə, ye də nà' kpə laŋ yà'a, dzədzəm nè jì fàak sè' dzədzəm nè nà'a kpəkpe.

3

Ngə' Nè Aco Lum Nwè Jəŋ Və

¹ Bwema am wèŋ, ka bèbɔŋ co wèŋ ŋkàũŋntèŋ lap mandzè ŋgòye ŋgàa yə'rè bwìŋ bum yeŋ, búusè səsak njàvès nè vées yə'rəgè bwìŋ bum nè kè gũ nduk. ² Vès pwe'fo' gùgè jòn nèbɔp. Nwè nəmòk ye-a yo nè yi kà cù bə jòn cèpgè, ye də yi ka jòn tse' lok. Ye də aco yi riŋ ŋgòkotse' ni' ye bə nsàp mandzè nè fòlòŋ. ³ A gèsə fagè nàambà'rè kwan mɔ cùhu də ya wo yuk duk, yà' gũ wo ŋgògì lòmvwè' sè a dzəm pwe'fo'. ⁴ Ja'a na ŋgwes sè ghaŋ, sè yà'a gìgè mɔ ndzəpè yè'e nè. Yà' yam maŋgəŋgèŋ, nə sə gi bə nàaŋ sè fəfə sə bwì' lòyà' yi. Nà' yam-a sè vɛ'nə fana ŋwè nè yi cu ca sə busə kɛ' nà' bə mɔ bès tɔ mòk, nà' sə lo mvwe' sè yi sə dzəm sə. ⁵ Yà'a mvəsè lɔm ŋwè mègù sè' mɔmvè' anə. Nà' gù mwejo, nə sə cep bum sè ghaŋ. Ja'a na yòo mvəsè aco mɔ nà' mis nè jo vɛ'ɛ tɛŋ wes mfèŋ nda è.

⁶ Lɔm nə gù sè' co mis. Nà' tse' nsàap bɔp sè sə nzenɡòn fɛɛŋ pwe' mbwa. Yi cu ndzə ni'ì vès, nə sə gũ bɔp ye ŋgòsam kɛ' lo bə ni' nə lòŋfo'. Lɔm nə bwe'gè mis nè co nà' tɛŋ səsə wes yòŋsè ŋwè lòŋ nè lòŋ, ye jəŋ mvè'nə wo à dzə yi, nə kə dzeŋ mvè'nə yi kpɔ. Nsàp mis nà'nə tesə vègè mvwe' təm mis nə bə tu. ⁷ Bwìŋ tse' ŋkərèə sè ŋgògù nàamŋgòn bə swìŋ sè mɔbu nə ye bə nàamndzəp wèŋ lòŋ yuk duk. Nsàap yè'sə lòŋ bwìŋ a gù mè yà', yà' yuk duk sè' laŋ. ⁸ Yu nè mò'fis də ŋwè ka lɔm də ya nà'a yuk duk ntògɔ yuk. Bɔp rwìŋ mbwa nèbɔp, nə kà mvèk ŋgòcu yòŋsè jə. Nà' tse' lik sè'. ⁹ A kwasəgè Tà Nwì nè yi tɛ' avès sè' bə zeŋ, nə sə yak bwìŋ sè Nwì a gù wo ŋgòsəsə yi sè' bə zeŋ. ¹⁰ Nɡòkwəsə nə ye

ngòyàk bwiiṅ tesə vègè sè' mvwe' cùu sè mò'fis. A nə ye co bum yè'sə kà ve'nə ye, bwema am wèṅ na. ¹¹ Kaco mvwe' sè ndzəəp tesə kokgè sə nze, ndzəp nə ye lələm nə ye fe'lə sè' cəcuk yeṅ. ¹² Kaco tɹ lèmu' zəm pià yeṅ. Kaco ndi' mènḡgù zəm lèmu' sè' yeṅ. Nə ye sè' də, kaco ndzəp nè nà' sə tesə nə ye cəcəp ye fe'lə sè' bəboṅ yeṅ.

Nsàap Nkərə̀ Ba

¹³ Nḡà nkərə̀ ye-a mətsetsə'rə wèṅ yo, yi sə ḡu-a bum bəboṅ ya bwiiṅ riṅ də yi nḡà nkərə̀. Yi sə ḡu yà' bə fùè nḡòni də yi tse' nsàp nkərə̀ nè bəboṅ nə. ¹⁴ Fana wu tse'-a cəpntəm, nə ye nḡà wa bum bwiiṅ, nə ye wi', kà də wu sə kum ke'ca nḡùṅ də wù tse' nkərə̀ duk. Wu yà'sə nḡwè nè wù təhə lok zinə bə mvwès. ¹⁵ A ve'nə bùusè nkərə̀ nè nà' tsə mubu bohòNwii kà nsàp nà'nə yegè. Nà'a nkərə̀ nè sə nze fən, nà' ka yòṅsè Nwii tse', nà'a vègè bohòSatà. ¹⁶ Mvwe' sè bwiiṅ sə wa bum bùu mok, nə sə ye wi', fana bum kà fo' yəyərə̀ bə cù mò'fis ḡi. Nsàap bup sè fòlòṅ nə ye fa'nə sè'.

¹⁷ Nsàp nkərə̀ nè nà' tsə ma mubu bohòNwii yegè ye rəreṅ, nə ye fifi bə fùè. Nsàp nkərə̀ ànə ka ḡugutu tse', nà'a koksəgè manziṅ bohòbwiiṅ, nə sə ḡu tse' meḡu bəboṅ ḡhà yà lòṅ. Nḡwè nè yi tse' nsàp ntəm ànə kà kupsəgè, yi kà bwiiṅ sè' sə bərə̀. ¹⁸ Yà' kə lèsə də, bùu sè wo fagè bwiiṅ fifi sə bi nḡwii fifi, yà'a kùu', nə ḡuṅ, fana wo kə kup meḡu fo' ḡàbòṅ.

4

*Wu Ko Bum Nzenḡon Nge' Wù Kà Nge'e Nwì**Ye*

¹ Nsàp nè wèn sə lùlù, nə sə kuəm ke' sə vè bohòwèn yè'sə fò? Yà' sə tesə vè bohònsàp ntum jòn nè wèn tse'. Nsàp ènə sə lù ndzə ni'ì wèn nùumbu pwe'. ² Wèn sə dzəm bum, nə kà yà' tse', fana wèn ye nga'a də wèn zə bùu mok wèn. Wèn sə dzəm bum co wèn be' ko yà' bə nən, nə kà yà' tse', fana wèn sə kùəm, nə sə lùlù. Njo nè wèn sə kà bum yè'sə tse', a bùusə wèn sə kà Nwì də yi fa wen lɛn. ³ Wèn sə lɛn, wèn kà sə tse' bùusə yusə wèn sə tsəɾə ngògù bə zen sə bup. Wèn sə lɛn mɛgù bum yè'sə də wèn tse' yà' ngògù ntuum awèn sə kwa.

⁴ Wèn nga ko nto wèn, co wèn ka riŋ də nɔwè nè yi ye-a nge' bə bum sè sə nze fɛɛn, kaco yi ye to nge' bə Nwì yeŋ riŋ à? A ye-a sè ndà, nga yi də yi ko nge' bə bum nzenḡon, ye də yi gù ni' ye ngà bèn Nwì. ⁵ Yusə yà'a ndzənə nɔwək Nwì duk də, <<Yònsə nè Nwì a nònsə nà' ndzə ni'ì vèes dzəmgè də a ye bùu ye nèbup>>, yà'a ka ngàm yeŋ. ⁶ A gugun ngòyù mandzè Nwì, nə ye də bòvəm nè yi tse' ngòfa ves, tse' gha' nən yi nə nònsə bum sè bup sè ntuum avès sə dzəm. Nɔwək Nwì nə sə tsə' də,

<<Nwì bèn bùu sè wo nègè ni',

Nə sə fa nən bohòbùu sè wo kà ni' nègè.>>

⁷ Nà'a njo nè mù sə tsə' wen də, wèn fa ni' awèn bohòTà Nwì, nə beŋ Satà, ya yi caŋ me'rə wen. ⁸ Wèn soon kuəp və Nwì ya yi kuəp və wen. Wèn nga gù bup, wèn və kə cuk bo

awèŋ, nə ye wèŋ bùu sè wèŋ ka tsətsərè rərəŋ tse', ɡu ntuum awèŋ ye rərəŋ. ⁹ Wèŋ tsərə bup sè wèŋ ɡùgəə, nə ke' ŋgùŋ bə waŋ. Wèŋ teŋsə ywì, nə waŋ wa, si awèŋ sè yà' sə rɛɛŋ yà'a kupsə, yà'a kpu dèmm. ¹⁰ Wèŋ jəŋ ni' awèŋ sə nze bohòTà Nwì ya yi nə le' lokoksə wəŋ mətəsè.

Kà Nwè Yò

¹¹ Bwema am wèŋ, ka bəboŋ co wèŋ sə yoŋ ŋwè mòk yeŋ. Nwè nè yi yo-a moma ye, kè də yi sak nà' àlɛ', ye də yi sə ɡù yà'sə bohòlùk Nwì. A ye-a ŋga wù sak lùk nə, ye də wù ka ŋwè nè wù sə ɡù yusè lùk nə sə duk yeŋ, wu ŋwè nè wù sə tsərə də wù ɡha' ɲaŋ lùk nə. ¹² Nɡà fa lùk, nə ye ŋɡà səsak mèɡù mò'fis, yi Nwì, a sè yi nè yi tse' ɲaŋ sè ŋɡòlùŋsə ŋwè, nə ye ŋɡòzə nà'. Fana wu yè'sə ndà nè co wù sak bwe tè'ɛ yo ɛ?

Nwè Ka Zòŋ Riŋ

¹³ Wèŋ yu'rə na jo è, wèŋ sè wèŋ sə duk də, <<Ntinə kè zòŋ è' a nə lo mwɛ' lak yà'a bə yà'a, nə kə cum fo' lùmŋgòŋ mò'fis, nə seŋ bum fo', nə tse' swe'.>> ¹⁴ Nɡa wèŋ ka yusè yà'a nə ɡu yòŋsəə awèŋ sə zòŋ anə riŋ. Yòŋsəə awèŋ sə yè'sə yu yà? Yà' meɡu co mumbà' nè wu yàŋ yəɡè nà' nè zəzòŋ, ɡhàr nà' sam bisə nà'a. ¹⁵ Bògha' co wèŋ duk lɛ də, <<A ye-a ŋga Tà Nwì dzəm-a vɛ'nə, ŋga a cu ŋwəm, vesùwèŋ nə ɡu yu yè'e bə yu yà'a.>> ¹⁶ A ŋga'a də wèŋ sə kùmŋgùŋ, nə sə tse' cù nèbup. Nsàp cèp cù nə bə ləŋɡàŋ nà'nə bup.

¹⁷ Ye də ŋwè nè yi rì də yè'e yusè bəboŋ sè co yi ɡu yà', nə kà yà' ɡù, ye də yi ɡù bup.

5

Ntip Nè BohòBù Ngàa Ghàk

¹ Ngàa ghàk wèŋ, wèeŋ yu'rə fa mɯ-a momjo è. Wèeŋ waŋ ke' torə ŋgùŋ bùu nsàp ŋgə' nè nà' sə vè bohòwèŋ mvək momjo. ² Ghàak awèŋ sə bì bɯp lòo, nzək zɯ vəpsə wes bəbòŋ cəək awèŋ laŋ. ³ Ndu a ta wes mbàam awèŋ, ndu sə tə ŋgònitsə' də wèŋ tse' njo, yà'a nə ta ŋgùp ni' awèŋ co mis tèn yà' yi. Wèŋ sə lòsə nòŋsə mbàam awèŋ, nə kà rì də nze nə kuəp ŋgòmè laŋ rì à? ⁴ Wèŋ a ka bùu sè wo a fàk mɯ nzuù wèŋ mbàam awo lak fa. Yuk-a mvè'nè wo sə wa è. Nwì Tà nè ghaŋ a yuk wa bùu yè'sə laŋ. ⁵ Wèŋ a zɯ jə nze nè'nə tè nə sə gu bum mvəsə yà' bòweŋ. Wèŋ a zɯ, nə fɯə co mbòŋ nè yi sə tək numbu nè wo nə sɯə yi. ⁶ Wèŋ a sak bùu sè bəbòŋ co wo bùu sè bɯp, nə zə wo. Wo cum megu gəe'.

Ko Ntɯm Nə Sə Lɛŋ Nwì

⁷ Ko ntɯm bwema am, tètè Tà kə və. Kək ja'a mvəsə ŋga nzum təkɡè də zuzɯ kɯrə mɯ nzuù yi e. Yi kogè ntɯm mvək lùm tè mbàŋ kə li. ⁸ Wèŋ tse' ŋgòtək sè' vɛ'nə tètè Tà nə və. Vèvè ye nə kuəp yè'sə laŋ. ⁹ Wèeŋ kà də wèeŋ ŋwɯrə ke'ca də ŋwè nəmòk sə kà mvəsə wèŋ dzəm sə gù ŋwùrè, bwema am wèŋ na. Njo nə də ya Nwì kà weŋ kə sak. Ngà sak nzak nə kuəp ŋgòvè laŋ. ¹⁰ Tsərə na ngàa tsòhòbum Tà Nwì sè wo anə ye to mantombì yà'a nè. Wo yà'a nsàap ŋgàa yə ŋgə', nə sə ko ntɯm. ¹¹ Vès duk də wo cu bə kwəkwa bùusè wo ànə sə ye ŋgə'

ve'nə, fana wo kiŋ ntəm, nə təəŋ mali guŋuŋ, nə kà mè'rè. Mù rì də wèŋ à yuk mvəsə Jup à kì ntəm ghà nè məmumsə a vè bohòyi, fana Tà Nwì kə se yi maŋkwèŋ yà'a laŋ. Bə nè zinə, Tà tse' koksəmanziŋ bohòvès cèbùè.

¹² Yumòk sè yà' gu càsə də, wèeŋ cu ŋgòcèp yumok, wèŋ kà kèŋ, bwema am wèŋ a. Kà də wèeŋ keŋ ntòbu kè nzeŋgòŋ, kènə də wèeŋ keŋ to liŋ yumok duk. Bòdə wèeŋ duk megu də <<Ŋ>> ŋga wèŋ dzəm, nə duk də <<Hai'>> ŋga wèŋ ka dzəm.

¹³ A ye-a ŋga ŋwè nəmòk sə yə ŋgə', boŋ də yi leŋ Nwì, fana a ye-a ŋga mòk sə kwa ye kwa, yi yəm kuksə liŋ Nwì bə ŋkì. ¹⁴ Ŋgà yiyaŋ ye-a mətsetsə'rə wèŋ yo, yi to bù ŋkwàha bùu sè mu cos, wo kə leŋ fa yi pìriyà. Wo leŋ, wo yok yi bə mve' mənə liŋ Tà Jisòs. ¹⁵ Pìriyà nè wo leŋ nà' bə dzədzəm nə, nà'a nə gu yiya nə me. Tà Jisòs nə gu yi guŋ fe'lə səmok. A ye-a ŋga yi à gù bup, Nwì swifa yi yà' sè'. ¹⁶ Fana bòbohòwèŋ də, mòk tsoho fa mòk bup ye sè yi guu, mòk tsoho fa mòk sè' ve'nə, ya mòk leŋ fa mòk, mòk leŋ fa mòk nə sè', ya yiyaŋ kà weŋ ya, ya Nwì luŋsə weŋ. Nsàp pìriyà ŋwè nè yi kəkurè tse' ŋàŋ nja ŋgògà bum nèbup. ¹⁷ Alajà à ye sè' ŋwè co vesùwèŋ ve'ε, nə leŋ Nwì nə zinə də mbùuŋ kà li. Mbùuŋ à ci'i, nə kà sə nze cəm mənə luumŋgòŋ tɛ' bə bwes. ¹⁸ Anə geŋ, yi leŋ fe'lə səmok, mbùuŋ li tsoŋ mubu nèbup, fana bum to.

¹⁹ Bwema am wèŋ, a ye-a ŋga mòk mətsetsə'rə wèŋ jàm me'rə-a mandzè Nwì nè zinə nə, fana mòk kə jəŋ fəsə və yi səmok. ²⁰ Rìŋtse' də a

ye-a sè ndà pwe' nè yi fis fəsə vè ngà gù bup
mvwe' bup ye, ηwè ànə bwi və mvwe' mandzè
nè bəbɔŋ, fana ye də yi fèp fis fa ngà gù bup ànə
yòŋsè ye mvwe' kpɛ, nə swihi bup sè co wù kà
fùk.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 22 Feb 2024 from source
files dated 29 Jan 2022

c475d5b3-da44-51cf-93ca-f255b72fe481